

## *Чужан муӧй, сьӧлӧмшӧрӧй*

Менам чужанінӧй - тайӧ Коми Республика, Кулӧмдін район Шӧръяг посёлок. Чужан му – тайӧ места, кӧні ме чужи да ола. Тані медся югыда дзирдалӧ шонді, ливкйӧдлӧны мыла сьыланкывъяс кайяс, небыда шарӧдчӧ кок улад веж турун, медся чӧскыд дука мича да уна рӧма дзоридзьяс. Миян тані югыд да гора йӧлӧгаа кыз пу расьяс, зумыд пожӧм ягьяс.

Чужан муӧй меным медся дона. Тані ме велӧдча школаын, тані менам котыр, ёргьяс. Накӧд менам йитчӧны бур казтылӧмьяс, сьӧлӧмкылӧмьяс.

Посёлокным миян кӧть и ичӧт, но сулалӧ гажаинын. Миян и миртуйыд матын, и вӧрыд матын, тшакла да тусьла сӧмын котӧртлы. Шӧр улич вывті мунігӧн синмад пыр и шыбитчӧ миян мича паркным. Гожӧмнас тані ставыс турунвиж. А тӧвнас пуясыс дзирдалӧны, быттьӧ мойдӧ веськавлан. А арнас синтӧ он вермы вештивлыны пуяссьыс. Найӧ уна рӧма платтьӧяс пасьталӧны. Кыззьяс зарни паськӧм кышалӧны, пелысьяс – югыд гӧрд, пипуяс- пемыд гӧрд... Сӧмын козьяс да пожӧмьяс сулалӧны турунвиж паськӧмӧн.

Посёлок бокті неылын визувтӧ Эжва юным, коді ылӧдз нуӧ ассьыс сӧстӧм васӧ. Локтан Эжва бокӧ, видзӧдлан джуджыд кыр йывсянь югыдлӧз ва вылас, да сьӧлӧмыд заводитӧ гораа тіпкын радысла. Ӧд кутшӧм ставыс сӧстӧм да мича гӧгӧрбок!

Ме зэв ёна радейта ассьым чужан муӧс. Тані меным зэв кыпыд да гажа овны! Ӧд сӧмын тані ме ачымӧс кыла ас мортӧн, коланаӧн! И татысь ме некытчӧ мӧдлаӧ ог кӧсйы мунны.